



Fretilin iha Parlamento Nacional

November 15 at 8:16 AM ·

Dili, 14 November 2018

KOMUNIKADU IMPRENSA

FRETILIN Vota Kontra Proposta Alterasaun ba Lei Nu. 13/2005 ne'ebé Deputadu husi Bankada CNRT, PLP, KHUNTO, PD no UDT/Frente Mudansa Apresenta

Deputadu sira ne'ebé kompoin Bankada FRETILIN iha Parlamentu Nasionál vota kontra proposta Alterasaun ba Lei Nu. 13/2015 kona ba Atividades Petrolíferas ne'ebé hato'o husi deputadu balu husi Bankada CNRT, PLP, KHUNTO, PD no UDT/Frente Mudansa.

Kona ba proposta atu altera Artigu 2 ne'ebé halo referencia ba Tratadu Fronteira Marítima assina iha lora-6 fulan-Marsu tinan-2018, FRETILIN hare katak alterasaun ida ne'e viola Konstituisaun Repúblika Demokrátika de Timor-Leste nian no mós Lei Internasionál kona ba Tratadu Internasionál sira tanba wainhira Tratadu Fronteira Marítima ne'e Timor-Leste ho Australia seidauk ratifika, tratadu ida ne'e seidauk vinkula.

Iha proposta alterasaun ba Artigu 22, FRETILIN hare katak proposta Alterasaun ne'e hakarak atu atribui kompetensia ba Konsellu Ministrus ka Primeiru Ministru atu deside kona ba partisipasaun pessoa kolektivas públikas ka sira seluk iha atividade petrolífera iha Timor-Leste. FRETILIN hare katak alterasaun ida ne'e bele loke dalan ba grupu elite kiik ida deit iha Timor-Leste mak sei sai riku liu tan no kontrola riku soin Timor-Leste nian.

Deputadu FRETILIN Antoninho Bianco argumenta, "alterasaun ida ne'e bele hamosu konluiu no nepotizmu no loke dalan atu grupu kiik ida deit mak kontrola rikusoinsira tomak Timor-Leste nian."

Alterasaun ba artigu ida ne'e mós fo autorizasaun atu kontratu ba fa'an no sosa, akizisaun no transferensia sira iha atividades petrolíferas la sai sujeitu ba fiskalizasaun previa Kámara de Kontas nian.

Deputadu FRETILIN Joaquim Boraluli hatete "Alterasaun ida ne'e ladiak ba Estadu Timor-Leste tamba sei halakon poder fiskalizasaun Tribunal das Kontas nian no bele la liu Orsamentu Jerál Estadu nian."

"Efeito ida husi alterasaun ba Lei ida ne'e bele mós haboot poder informál ida fora husi estrutura poder formal atu kontrola Estadu," Boraluli hatutan.

"FRETILIN rejeita alterasaun Lei Atividade Petrolífera tamba alterasaun ne'e sei hasai poder fiskalizasaun Tribunal das Kontas nian. Ida ne'e inkonstitusionál, maibé mós sei halakon tiha prinsípiu sira transparansia, boa governasaun, no check-and-balance iha ita nia Estadu," Deputadu Joaquim Boraluli konklui.

REMATA

